



Kamis, 23 Oktober 2021
Ogen: Masmur 20:7-9



Tuhan Si Mereken Kemenangan



Masmur enda banci jadi lit i bas paksa perang si arus ilakoken raja Israel. I bas perang arus lit perencanaan si mehuli, alat-alat perang si cukup bage pe tentera si maju ku bas perang e pe tentera pilihan. Tapi i bas raja-raja Israel lit si perlun asangkan perencanaan enda ndai kerina.

Si pemena, raja perlu dukungan bas rakyat nari bage pe arah Nabi Tuhan. Bali sanga bangsa Israel erperang ras bangsa Amori, tentera si erperang itumpak-tumpak arah pertoton kerina bangsa Israel ras Musa. Sanga ipenangkik Musa tanna erbaha pertoton, menang bangsa e. Si peduaken, si iperluken raja gelah ia menang e me kap ndengkehken ras patuh nandangi sora Tuhan. Adi la patuh bali ras Saul, erperang atena ras bangsa Pilisti, tapi la bage sura-sura Tuhan, ulihna talu ia ras kerina tentarana si erbahansa ia mela.

Kegeluhenta bage pe kegeluhen gerejanta itumpak-tumpak labo arah kinibeluhenta ngaturken ras ngerancangensa alu pemetehta. Gegehta ersibar ras erbaleng, tapi kuasa Tuhan kap si la ersibar ras la lit baleng-balengna. SKMS (Sidang Kerja Majelis Sinode) i bas wari si sendah nggo seh. I bas piga-piga wari SKMS e sendah nggo idatken notulensi ulih pengukuri ras penjujuri Dibata kerna dahin mpekena-kena GerejaNa. Sitotoken Moderamenta gelah ngasup ia ngaturkenca ras nginget-ninget ulih persidangen e i bas pelayanen GBKP enda. Sitotoken gelah tetap patuh kerina serayan-serayanNa makeken ulih SKMS e i bas kerina tingkatan pelayanen GBKP enda. Sitotoken ulih persidangen e gelah erguna man kerina ras ncidahkan kemulian Dibata. Sabap Dibata nge si mereken kemenangen man banta. Kemajun GBKP enda jadi arah Perkuah ateNa ras arah penalementa nandangi Tuhan si mada Gereja enda. Sada pengidahta ndalanken ulih notulen i SKMS enda, terpuji Tuhan arah GerejaNa.